

五邊典則

顧廷龍署



五邊典則

卷之四

五邊典則卷之十七

信安徐日父子卿父集

勾餘施邦曜爾

閩漳張

燮紹和父

嘉靖七年正月大學士楊一清言臣出入中外幾四十年而在陝最久竊見甘肅一鎮自蘭州度河所轄諸衛綿亘二千餘里番虜夾于南北一線之路通其中肅州嘉峪關外夷羗雜處寇盜無時自昔號爲難守而今日事勢又有異者亦卜剌阿爾朮斯二賊竊伏西

海始而殘害諸蕃今則與蕃聯合窺我莊涼
又犯我河洮之境矣西域土曾蕃踵惡數世
先年獨殘破哈密後則沿邊王子莊等處赤
斤罕東等蕃衛俱被蹂踐遂敢稱兵叩關犯
我肅州困我甘州鎮城矣今卽未能奉辭遠
討則先事預防之慮胡可旦夕忘也臣聞禦
戎之策兵食爲急今各衛所行伍空虛士卒
疲憊戰守之具徒支目前若不於逃亡者設
法勾補見存者加意撫卹脫有邊警何以備

之河西糧儲匱乏士有饑色馬多瘦損內地
所派旣不足外供

朝廷間發內帑給之亦不過卽糴所在之粟入
在所食廩而已而境內布種不廣別無輦致
雖有官銀無從糴入以故穀價騰踴日異月
殊所司往往以銀散之衛所軍餘令市買納
官責限督併衆口嗷嗷怨聲載道夫處積邊
儲不過糴買召商二事今糴買旣有弊惟召
商爲最便之法宜自今定制允開中益引務

令商人上納本色邊儲銀兩除量留以備豐
歲折放亦當召商糴粟稍優其直而不苟其
收則應者自衆矣然欲以本土之所出供本
土之所需非廣與也種不可今者遣官清查
塞田授軍耕作誠探本之策而其故亦不可
不講也何則正軍充伍餘丁撥屯例也但其
中有有軍無餘者有有軍餘而無力不能布
種者故屯地多侵沒于將領豪右之家以致
屯軍終歲賠糧有貧丁以田假佃于人者有

田隔遠磽瘠無人願假不得已終歲傭身以
輸糧而不足者管屯之官至計十歲以下幼
男報充屯丁叅兩朋合謂之搃糧屯事至此
邊人之困尚忍言哉故欲廣興屯種非先補
助屯丁不可按軍士三守城七屯田例也今
各征操之外有乘墩守堡伏塘等役卽守城
且苦乏矣其何有于屯宜令清軍官查理各
衛軍戶應解者俱選解健丁仍加帶軍餘一
人戶大族聚者二入與俱詣邊以補屯卒使

來則有親屬以爲侶至則有田業以爲家庶
生理相依而逃亡者鮮矣不然亦可倣古募
民塞塞之意召募隴右關西之民以屯塞下
授地之外任其開墾俟三稔乃徵其租一切
徭役皆復之如此則利可資身人爭向募矣
又考先年屯政脩舉之時牛具種子皆爲官
物凡屯軍以年老或選伍代去者例以牛具
種子若干隨田還官今盡廢矣宜倣其法以
萬金買牛及田器審貧丁係貧窶者及清解

召募初至者人給牛牝牡各一隻犂鐮各一
具種子伍石每年所獲自輸租外卽償原假
種子以備春作更給至于屯地理沒者則聽
人首告占種子官豪者諭令吐退而不追其
往可也或有以虜警爲慮者臣謂春種秋獲
各不過一二旬設令各該守臣先期曉諭約
日並作大發卒爲之守望寇至舉烽卽可收
保且虜入寇亦有時壠畝連雲禾稼蔽野虜
馬亦安能盡殘之乎管屯之官尤必委任得

人貪婪侵尅者罰無赦三年以上屯糧無負者賞之五年以上無負及有贏積者薦舉擢用屯政大要不過如此若徒以清查催納爲名而無實心經理之方恐于邊備終無益也

二月工科給事中陸粲言陝西河套本吾內地國初設東勝衛以控扼之自後棄爲虜巢其寧夏花馬池至靈州一帶地方最爲虜衝地勢平衍無險無恃邊牆低薄壕塹淺狹虜衆深入往往繇此正德初年令大學士楊一

清總制陝西欲將延綏定邊營迤東石澗池
至寧夏橫城三百里內邊牆增築高厚事已
就緒會本官去任僅築四十里而止迄今議
者多言邊塞風沙版築之功難成易敗然前
項所築邊牆四十里計今且二十餘年屹立
如故則斯言謬妄可知夫興事立功要以實
心爲主能極堅固自堪耐久須如當時原議
築牆浚壕高廣深濶皆踰二丈有敵臺以便
守禦有煖舖以便巡警有小堡壘相協助有

墩臺以便瞭望守邊固圉之計莫先于此臣
嘗詢訪西人謂有五利焉混高視下以逸待
勞士有全力以制虜敵一也畜牧在野不畏
驅掠歲益蕃孳邊人富寔二也邊境方乏馬
墻成則步卒可守量省騎兵減芻秣之費三
也靈州大小塩池近以虜警頻仍坐失歲課
墻成則撈採以時商販無阻課額充足軍用
益饒四也廣開屯田安意耕穫漸省轉輸寬
內郡之力五也乞

勅陝西提督大臣會同彼處巡撫親詣前項地方相度整理仍發太倉銀一二十萬濟其經費不足則量開鹽引或支陝西布政司無礙官銀佐之選委賢能專董其事春夏興工秋冬輟役期一二年間奏績則邊防久固矣疏下兵部覆稱前項工程本部節因守臣之請覆行總制大臣會官勘議今且四年猶未奏報宜趣令總制尙書王憲速議以聞

上曰茲事旣邊防有益可卽查先年諸臣論奏

及議處事宜詳具奏聞不必仍襲虛文勘議
于是兵部備查一清初議及節年都御史邊
憲王時中王翊張潤周等議或請逐歲脩舉
或請先固要害或請徵夫役或請發帑銀大
略意指相近擬仍

勅王憲會同各守臣相度時勢脩舉

上從部議

命推文武大臣誠心憂國者各一員如一清初
議亟往經略興工戶部速發帑儲佐之勿靳

費

三月楊一清言近言官建議脩寧夏花馬池
至靈州一帶邊牆此本發自愚臣中道沮止
自後屢議脩築竟不果行繇不得任事之臣
故也今荷

聖明允行又

命部臣會推才望大臣專理其事邊防幸甚但
所用人必年力精壯乃能任勞必器度宏裕
乃能計遠資淺而優其官秩使無躁進之心

才充而重其事權使藉可爲之勢令督同鎮
巡等官親歷邊城相度事勢合用錢穀器具
先期措備遣謀套內無賊二月興工五月停
止八月興工十月停止順時量勢以爲緩急
期以五年大工必就牆塹高深廣濶丈尺如
臣所畫套中故有伏虜其勢不過千人不可
以此藉口興武諸營各有守將架梁防護乃
其責任寧夏中路叅將鎮城遊擊可至期調
取使之就近防守仍稍取寧夏兵車數百輛

于興工之所布列成營使丁夫有所棲避待
大邊旣成則以餘力于延綏定邊營以東至
寧塞營寧夏橫城以北至黑山營坍塌邊牆
一切脩補

上深納其言會廷臣俱准兵部右侍郎王廷相
可任

上卽用廷相命兼都察院右僉都御史提督延
綏寧夏邊防脩理牆塹仍諭廷相以一清所
奏會三鎮鎮巡等官同心議畫務有實效